

Nuwe Lied Bediening

En Hy het 'n nuwe lied in my mond gegee, 'n lofsang tot eer van onse Elohiem (Ps. 40:4)

E-pos: kontak@nuwelied.info
Webwerf: <http://www.nuwelied.info>

Yeshua is die Boom van die Lewe. Wanneer ons die Torah bestudeer moet ons onthou dat Yeshua Messias die Lewende Torah is – die Woord van YHVH wat vlees geword het. Hy is die weg na die waarheid wat lewe gee – die Lewende Manna wat uit die hemel gestuur is. Sonder Yeshua wat deur die Afgesonderde Gees in ons, en deur ons lewe, sal die geskrewe Torah net die dooie letter van die wet wees!!
Yeshua is die hart van die Vader!

Parashah 46: Ekev (עֵקֶב) – Omdat

Dan sal dit gebeur, omdat jy hierdie wette gehoorsaam, hou en doen, dat יהיה, jou God, Sy verbond en Sy onverdiende guns met jou sal hou wat Hy aan jou vaders gesweer het. Deut. 7:12 – PWL¹

Torah: Deut. 7:12 tot 11:25

Haftorah: Jes. 49:14 to 51:3

Nuwe Verbond: Matt. 6:33; Rom. 10:1 tot 3; 2 Kor. 5:21; 1 Thess. 4:1 en 2; Heb. 4:1 tot 7; Joh. 14:15, 21 en 23; 1 Joh. 2:3 tot 5; 1 Joh. 5:3; Luk. 9:1; 10:19; Joh. 10:10; Rom. 8:31 tot 39; 1 Joh. 4:4; Rom. 2:28 en 29.

Hierdie notas is aanvullend tot die vorige notas vir Parashah 46 wat afgelaai kan word by: [Parashah46Notas14](#) of by [Parashah46Notas15](#).

The wise man enjoys life and sees the beauty and wisdom of the Creator at work even in times of trial and tribulation. The foolish man despairs of life and finds just as many reasons to complain in the midst of blessing and prosperity as he does in times of adversity – Bill Bullock.

When the root is bitterness, imagine what the fruit might be – Woodrow Kroll.

Great opportunities come to those who make the most of the small ones – Kalman Packouz.

¹ Alle teksverwysings is geneem uit PWL Vertaling, behalwe waar anders vermeld. Die PWL Vertaling (Pad van Waarheid tot die Lewe) kan gratis afgelaai word by www.padwlewe.ch, maar is ook in gedrukte formaat beskikbaar. Om 'n kopie van die Bybel te bekom kan Gerrie Coetsee per e-pos by padwlewe@yahoo.com of telefonies by 074 361 2134 gekontak word.

If there are more people in the cart than there are people pulling the cart, the cart will never make it up a hill – Ron Ewart

Midrash (Torah Bespreking)

Moses is steeds besig om aan die volk 'n oorsig te gee van alles wat met hulle, en veral met hul ouers wat in die wildernis gesterf het, gedurende die veertig jaar swerftog gebeur het. Hy is besig met sy afskeidswoorde aan 'n volk wat hy tot die einde getrou gedien het. Sy woorde is beide waarskuwend en bemoedigend!

Daarom lees ons teen die einde van verlede week se Torahskriflesing dat Moses sê:

want jy is 'n afgesonderde volk tot יהוה, jou God; יהוה, jou God, het jou vanuit al die volke wat op die aarde is, gekies om 'n volk vir Sy eie besit te wees. יהוה het nie Sy liefde op julle gesit of julle gekies omdat julle meer was as al die ander volke nie, want julle was die minste van al die volke, maar omdat יהוה julle liefhet en die eed gehou het wat Hy tot julle vaders gesweer het, het יהוה julle met 'n sterk hand uitgelei en julle bevry uit die huis van slawerny, uit die hand van Farao, die koning van Mitzrayim. Deut. 7:6 tot 8.

YHVH het Israel op grond van liefde gekies en hulle van die slawejuk van Egipte bevry op grond van die verbondsbelofte aan Abraham (Genesis 15), en soos dit bevestig was aan Isak en Jakob. Daarom het Moses aan Israel gesê:

Weet daarom dat יהוה, jou God, God is, die getroue Magtige God, wat Sy verbond en Sy onverdiende guns hou tot 'n duisendste geslag met dié wat Hom liefhet en Sy opdragte gehoorsaam, maar aan die wat Hom haat, betaal Hy dit terug in hulle gesig, om hulle te vernietig. Hy sal nie terughou teenoor dié wat Hom haat nie, Hy sal hom in sy gesig terugbetaal. Jy moet daarom die opdragte, die reëls en die wette wat ek jou vandag beveel, doen. Deut. 7:9 tot 11.

Moses herinner Israel daaraan dat YHVH 'n God van liefde en oordeel is – van genade (onverdiende guns) en van regmatigheid (geregtigheid). Aan die wat YHVH liefhet deur Sy opdragte te gehoorsaam, bewys Hy voortdurende onverdiende guns, maar Hy sal sonder versuim die wat ongehoorsaam is, naamlik Sy haters, straf!

Die verhouding tussen YHVH en Israel is dus 'n liefdesverhouding en liefde is nie afdwingbaar nie, maar is 'n vrywillige daad. YHVH het as Vader (Bruidegom) sy kinders (bruid) lief en die kinders (bruid) het hulle Vader (Bruidegom) lief. Die fondament van beide die ou en die nuwe verbond is dus genade en liefde!! Liefde (vir YHVH en jou naaste) is soos die gordynreeling waaraan twee gordyne hang, naamlik die wet (die Torah) en die profete. Sonder liefde val die 'gordyne' op die grond en dien geen doel nie!

Yeshua antwoord hom: “Jy moet יהוה, jou God, liefhê vanuit jou hele verstand, wil en emosie, vanuit jou hele gees, vanuit al jou kragte en vanuit al jou verbeelding en begrip. Dit is die eerste en grootste opdrag en die tweede, wat net soos dit is: jy moet jou naaste liefhê net soos jouself. Aan hierdie twee opdragte hang die hele Wet en die Profete.” Matt. 22:38 tot 40.

Paulus bevestig die woorde van Yeshua toe hy in sy brief aan die Korinthiërs geskryf het oor die uitnemendheid van die liefde:

As ek al die tale van mense en engele praat en ek het nie liefde in my nie, dan sal ek kletterende koper of 'n rasende simbaal word. As ek profesieë in my het, al die geheime ken,

al die kennis het en as ek al die vertrouwe in my het sodat ek berge kon verwyder, maar ek het nie liefde in my nie, sal ek niks wees nie. As ek alles wat ek het vir die armes gee en as ek my liggaam oorgee om verbrand te word en ek het nie liefde in my nie, dan is dit vir my geen voordeel nie. 1 Kor. 13:1 tot 3.

Liefde en gehoorsaamheid loop hand aan hand! Daarom herinner Moses weereens die volk daaraan om YHWH se Torah – die boek van die wet – te *sh'ma*, te *sh'mar* en te *asah* – te hoor, te bewaar en dit nougeset te doen (Deut. 7:11). Dit sal die bewys wees van hulle liefde vir YHWH en van hul dankbaarheid dat YHWH hulle nie uitegwis het toe hulle die bloedverbond (die boek van die verbond – Ex. 19:5 tot 24:11) verbreek het met die aanbidding van die goue kalf nie (Ex. 32:10 tot 14).

Dan begin hierdie week se Skriflesing met die volgende woorde van Moses:

Dan sal dit gebeur omdat (ekev) jy hierdie wette gehoorsaam (sh'ma), hou (sh'mar) en doen (asah) dat יהוה, jou God, Sy verbond en Sy onverdiende guns met jou sal hou (sh'mar) wat Hy aan jou vaders gesweer het (Deut. 7:12).

Weens YHWH se liefde en Sy onverdiende guns vir Israel sal Hy die verbond met Abraham, Isak en Jakob, naamlik die verbond van die belofte (Efes. 2:12), hou (*sh'mar* – dit omhein, dit beskerm en daarvolgens handel). YHWH sal getrou bly aan die verbond met Abraham en Hy sal dit in Yeshua vervul!

Indien Israel uit liefde hierdie wette gehoorsaam, sal YHWH hulle oorfloedig seën en hulle vermenigvuldig en:

Hy sal ook die vrug van jou baarmoeder en die vrug van jou land seën, jou graan, jou nuwe wyn en jou olie, die aanteel van jou beeste en die vermeerdering van jou kleinvee, in die land wat Hy aan jou vaders gesweer het om vir jou te gee.

Jy sal meer geseënd wees as al die volke; daar sal tussen jou geen man of vrou steriel of onvrugbaar wees nie; nie onder jou of onder jou vee nie.

יהוה sal elke siekte van jou af wegvat en jou nie aantast met enige van al die skadelike siektes van Mitzrayim wat jy geken het nie, maar sal dit laat kom op almal wat jou haat.

Jy moet al die volke wat יהוה, jou God, aan jou oorgee, vernietig. Jou oog mag hulle nie jammer kry nie en jy mag nie hulle gode dien nie, want dit sal vir jou 'n valstrik wees.

Deut. 7:13 tot 16.

Die oorhoofse doel van hierdie wette, ook bekend as die Torah van Moses of die boek van die wet, was sodat Israel in die regte verhouding met YHWH kon leef tot Yeshua sou kom. Die Torah van Moses was ons gids (tugmeester) (Gal. 3:24 en 25) tot Yeshua gekom het om aan die folterpaal die skuldbrief te betaal vir die oortreding van die Torah van Moses (Kol. 2:14), asook die skuld te betaal vir die verbreking van die Boek van die Verbond deur die aanbidding van die goue kalf. Die boek van die wet het Israel in bewaring gehou tot die heerlijkheid van Yeshua, wat groter is as die van Moses, sou kom (2 Kor. 3:5 tot 18). Hierdie Skrifgedeelte word in die volgende artikel meer volledig bespreek: [GB2.Feb13MosesSluier](#).

Die woord *Ekev* as die naam van hierdie parashah word as *omdat* vertaal, maar beteken ook hakskeen in die sin van dit wat volg op die hakskeene van 'n persoon, of dit wat volg op 'n bepaalde handeling of die resultaat is van 'n bepaalde handeling (aksie). In hierdie teksvers word *ekev* dus gebruik om dit wat op die hakskeen volg van die wat YHWH liefhet deur die verbond met YHWH te *sh'mah*, te *sh'mar* en te *asah*.

Die nageslag van Abraham wat Torah-gehoorsaam lewe, sal dus deur YHVH agtervolg word om aan hulle goed te doen! Dit herinner ons aan die profetiese woorde van Jeremia:

Ek sal 'n ewige verbond met hulle sluit: dat Ek nie van hulle af sal wegdraai om aan hulle goed te doen nie en Ek sal My respekvolle vrees in hulle verstand, wil en emosie gee sodat hulle nie van My af sal wegdraai nie. Ek sal My oor hulle verheug om aan hulle goed te doen en Ek sal hulle getrou in hierdie land plant, met My hele verstand, wil en emosie en met My hele lewe, want so sê יהוה: 'Net soos Ek al hierdie groot rampe oor hierdie volk gebring het, so gaan Ek al die goeie wat Ek hulle belowe oor hulle bring. Jer. 32:40 tot 42.

Hierdie is die blye vooruitsig wat die nuwe verbond inhou! YHVH Yeshua is die Goeie Herder wat Sy skape in die spore van geregtigheid lei, naamlik in die spore van Torah soos dit in Yeshua volbring is. Dan sal ons vir ewig in die huis van YHVH bly en dan sal goedheid en guns ons volg, al die dae van ons lewe (Psalm 23)!

Die Huis van die ou en die nuwe verbond

Moses was 'n sinnebeeld van Yeshua en hy was tydelik aangestel om die huis van YHVH – die gemeente – te bou tot Yeshua sou kom om aangestel te word om die huis van YHVH – die gemeente – te voltooi en vir ewig daarvoor te heers. Paulus verduidelik dit soos volg:

My afgesonderde broers, wat deel in die hemelse roeping, dink daarom versigtig aan Yeshua, Die Gesalfde Een, wat ons openlik erken as God se Afgevaardigde en nie-Levitiese Hoofpriester.

Hy is vertrouenswaardig teenoor God wat Hom aangestel het, net soos Moshe in God se hele huishouding getrou was,

want hierdie Een se lof en eer is baie meer as die van Moshe, soveel as wat hy wat die huis gebou het, baie meer eer het as die huis,

want elke huis word deur iemand gebou, maar Hy wat voortdurend alles bou, is God.

Moshe was as 'n dienskneg toevertrou met die hele huis, tot getuienis van wat nog deur Hom gesê sou word,

maar Die Gesalfde Een as Seun oor Sy huis. Ons is Sy huis as ons die vrymoedigheid en die trots van Sy goeie Boodskap tot die einde toe vashou. Heb. 3:1 tot 6.

Yeshua is nou vir ewig aangestel oor YHVH se huis en elkeen wat vertrou het in Yeshua as die gekruisigde en opgestane Messias tot vergifnis en versoening, is die huis (die gemeente, die ware Israel) van YHVH!

Daar word dikwels gepraat oor die twee huise, naamlik die huis van Juda en die huis van Efraim (Josef) en die eenwording van hierdie twee huise. Maar daar word vergeet dat YHVH vanaf die begin slegs een huis gehad het en dat YHVH steeds vandag slegs een huis het! Die verdeling van Israel in twee huise, naamlik dié van Juda (die Suidelike koninkryk) en dié van Efraim (die Noordelike koninkryk) was weens onderlinge struwelinge in die huishouding van YHVH! Maar in Yeshua het hierdie twee huise reeds een geword, soos Paulus dit verduidelik:

Daar is nie Jood of Arameër nie, daar is nie slaaf of vryman nie, daar is nie man of vrou nie, maar julle is almal een in eenheid met Die Gesalfde Een, Yeshua. As julle aan Die Gesalfde Een behoort, is julle die saad van Avraham en volgens die belofte, erfgename.

Gal. 3:28 en 29.

Nou, in Die Gesalfde Een, Yeshua, het julle wat vroeër op 'n afstand was, naby gekom deur die bloed van Die Gesalfde Een, want Hy is ons Vrede, Hy wat albei een maak en die middelmuur van skeiding vernietig het.

In Sy fisiese liggaam het Hy die haat waardeloos maak, wat deur die opinie van mense veroorsaak is aangaande opdragte aangaande die wet sodat deur Sy liggaam, die twee tot een nuwe mens geskep kon word.

Hy het die twee se verhouding met God herstel in Een liggaam en deur Sy kruisiging die haat doorgemaak.

Hy het gekom en die goeie boodskap van vrede, vergenoegdheid, gesondheid en voorspoed aan julle wat ver was en aan die wat naby was verkondig, want in Hom is daar vir ons albei toegang deur een Gees tot die Vader.

Julle is daarom nie meer vreemdelinge en besoekers nie, maar inwoners van die Stad van die Afgesonderde Een en kinders van die familie van God.

Julle word opgebou op die fondasie van die afgevaardigdes en die profete, met Yeshua, Die Gesalfde Een, self die Hoeksteen van die gebou.

In Hom word die hele gebou aanmekeer gesit en dit groei tot 'n afgesonderde tempel in eenheid met יהוה

terwyl julle ook vir Hom gebou word tot 'n blyplek van God in die Gees.

Efes. 2:13 tot 22.

Daarom het Yeshua gesê:

want Ek sê vir julle dat baie vanaf die ooste en vanaf die weste sal kom en saam met Avraham, Yitz'gak en Ya'akov sal skuinslê in die Koninkryk van die hemel, maar die kinders van die koninkryk sal uitgegooi word in die duisternis daar buite. Daar sal 'n gehuil wees en 'n gekners van tande." Matt. 8:11 en 12.

Eerstens sê Yeshua dat daar baie uit ander volke, en uit ander dele van die wêreld, naamlik Jode en nie-Jode (heidene; onbesnedenes) sal kom om saam met die Vaders (van die geloof in Yeshua) aan te sit (skuins te lê volgens die gebruik by 'n dinee) in die koninkryk van die hemele. Maar dan sê Yeshua dat die wat gedink het dat hulle volgens geboorte die kinders van Abraham is en daarom die koninkryk gaan beërwe, sal in die buitenste duisternis uitgedrywe word. Slegs diegene, Jood en nie-Jood wat wedergebore is deur vertroue in Yeshua as die Messias is die ware Israel.

Die volgende Skrifgedeeltes bevestig dit:

want net soos die liggaam een is en baie ledemate het, maar al die dele van die liggaam, al is hulle baie, een liggaam is; so ook met Die Gesalfde Een, want ons is ook almal deur een Gees gedoop tot een liggaam, of ons Jode of Arameërs, slawe of vrymanne is en ons is almal van een Gees gegee om te drink. 1 Kor. 12:12 en 13.

want die Skrif sê: "Elkeen wat in Hom vertrou, sal nie beskaam word nie."³ Hierin maak Hy nie 'n onderskeid tussen Jood en nie-Jood nie, want יהוה is Een vir almal van hulle en is waardevol vir almal wat Hom aanroep, want elkeen wat hom op die Karakter en Outoriteit (Naam) van יהוה beroep, sal lewe hê. Rom. 10:11 tot 13.

Moses was aangestel as die bouer van die huis van YHVH van die ou verbond en Yeshua is aangestel as die bouer en voltooiër van die huis van YHVH van die nuwe verbond. Moses was getrou en het die huis van die ou verbond volgens YHVH se 'spesifikasie' gebou. Net so was Yeshua getrou en is die huis van die nuwe verbond gebou volgens YHVH se

‘spesifikasies’. Dit is YHVH se ‘nuwe huis’ en Hy het die ou huis verlaat. Hierdie ou huis van die ou verbond word egter steeds bewoon deur diegene wat Yeshua verwerp het!

Ons moet die verskille tussen hierdie twee huise verstaan en besluit in watter huis ons wil woon en onder watter gesag ons staan!

Die ‘huisreëls’ van die huis van die ou verbond was vervat in die Torah van Moses en was toegepas deur ‘n Levitiese priesterorde wat diens doen in ‘n fisiese tempel wat deur mense gebou was.

Maar die ‘huisreëls’ van die huis van die nuwe verbond is vervat in die Torah van Yeshua (die boek van die verbond soos dit in Yeshua volbring is) en word toegepas deur ‘n Melgisédék priesterorde wat diens doen in die tempel waar die Afgesonderde Gees woon, naamlik in en deur die liggaam van elkeen wat vertrou in Yeshua as die Messias (1 Kor. 6:19). In Yeshua word die hele gebou aanmekaar gesit en dit groei tot ’n afgesonderde tempel in eenheid met יהוה, terwyl ons ook vir Hom gebou word tot ’n blyplek van God in die Gees!

Die wat in die huis van die nuwe verbond woon, is nie die kinders van die slavin Hagar nie, maar is soos Isak die kinders van die belofte aan Sarah wat vry is van die slawejuk van sonde. Onthou ook: Die ware Jerusalem is daarbo en nie die huidige Jerusalem wat saam met die kinders van Hagar in slawerny is nie (Gal. 4:25).

In Gal. 4:24 tot 31 verduidelik Paulus dat Sarah en Hagar ‘n sinnebeeld is van die twee verbonde (huise) – die een is die ‘ou’ woning van die kinders van Hagar wat in slawerny is en die ander is die ‘nuwe’ woning van die kinders van Sarah wat vrygekoop is deur die kosbare bloed van Yeshua (1 Pet. 1:18 en 19). Daarom sê Paulus:

Staan daarom vas in die vryheid waarmee Die Gesalfde Een ons vrygemaak het en moenie weer in die juk van slawerny gejuk word nie. Gal. 5:1.

Bepeins of Bespreek

1. In watter huis bly jy? Rabbynse Judaïsme bly in die huis van die ou verbond en moet daarom al die huisreëls van die Torah van Moses onderhou. Die huisreëls van die huis van die nuwe verbond is ‘n sagte juk en ‘n ligte las (Matt. 11:29 en 30), want dit is op beter beloftes wettelik gegrond (Heb. 8:6). Wat is hierdie beter beloftes? Is dit die verandering in die wet soos die brief aan die Hebreërs, veral in hoofstukke 7 tot 10 dit verduidelik? Is dit ‘n gawe van die Afgesonderde Gees?
2. Omrede Rabbynse Judaïsme Yeshua as Messias verwerp, staan hulle steeds onder die gesag van Moses, naamlik die Torah van Moses. Die Messiaanse Beweging is skuldig daaraan dat hulle hierdie huisreëls van die ou verbond wil toepas in die huis van die nuwe verbond! Sal die Huiseienaar dit toelaat en dit aanvaarbaar vind? Dit is noodsaaklik dat ons moet verstaan wie is die ware Israel en daarom wil ek elkeen aanmoedig om die gedeeltes van my notas van verlede jaar en beginnende op bladsy 4 onder die opskrif: *Die Nageslag van Abraham en die Ware Israel*, te lees. Dit kan afgelaai word by: [Parashah46Notas15](#).
3. In die huis van die nuwe verbond het die huis van Juda en die huis van Efraim reeds een geword – ‘n eenwording wat alleen moontlik is deur vertrouwe in Yeshua as die gekruisigde en opgestane Messias tot vergifnis van sonde. Is eenwording sonder Yeshua Skriftuurlik of is dit die pogings van mense wat glo dat Torah-gehoorsame Jode sonder Yeshua gered word? Ons moet onthou dat Satan het ook ‘n plan vir die einde van die

eeue wat by ons aangekom het. Ek herhaal wat ek in verlede jaar se notas in die verband geskryf het:

Daar bestaan 'n siening by sommige Christene en Messiane dat Jode wat die Torah onderhou gered word sonder om Yeshua as Messias te aanvaar. In 'n artikel (*The risk of loving the Jewish people more than you love the Jewish Messiah*) geskryf deur Eitan Bar, 'n Messiaanse Jood wat in Israel woon, waarsku hy teen hierdie misleiding en sê hy: *My challenge for you today is not to love us Jews into hell, but to live up to the biblical mandate of provoking us to jealousy in Yeshua (Romans 11:11). Trust me, I myself am living evidence that it worked 16 years ago, and it's still working with many other Jews.* In hierdie artikel haal hy die volgende aan uit John Hagee se boek: *In Defense of Israel*:

- *"The law of Moses is sufficient enough to bring a person into the knowledge of God until God gives him a greater revelation...Everyone else, whether Buddhist or Baha'i, needs to believe in Jesus, but not Jews".*
- *"The sovereign purpose for Jesus' life was to be a light to the Gentiles" (p. 133.)*
- *"There is not one verse of Scripture in the New Testament that says Jesus came to be the Messiah..." (p. 136).*
- *"The Jews were not rejecting Jesus as Messiah; it was Jesus who was refusing to be the Messiah to the Jews." (p. 140).*
- *"He refused to be their Messiah, choosing instead to be the Saviour of the world." (p 143).*

In sy artikel weerlê Eitan Bar elkeen van hierdie misleidende stellings van John Hagee. Die vraag is of jy dit ook uit die Skrifte kan weerlê? Lees ondermeer Matt. 15:24; Joh. 4:25 en 26 en Matt. 22:39.

Indien ons nie verstaan wie die ware kinders van Abraham is nie, asook nie wie die ware Israel is nie, loop ons gevaar om nie te verstaan wie die ware priesterorde is nie. Dan besef ons ook nie dat Rabbynse Judaïsme die teenstanders van YHVH is nie! Dan besef ons ook nie dat ons oë en hoop op die Hemelse Jerusalem gevestig moet wees en nie op 'n aardse Jerusalem met 'n derde tempel nie! Die artikel van Ina van Niekerk "Die Banier van JaHUaH" gee meer insig hieroor en kan afgelaai word by: [DieBanierJaHUaH](#)

4. Aansluitend by bogenoemde wil ek lesers ook aanmoedig om die artikel van Ina van Niekerk: *Toe Silo Gekom Het*, te lees, want die koms van Silo (Yeshua) het ingrypende veranderinge te weeg gebring wat nie deur almal raakgesien of geleer word nie. Daar is sekere begrippe of Skrifgedeeltes wat dikwels misleidend aangebied word en so die Skape se water vertroebel (Eseg. 34:18 – 19). Dit bring mee dat baie Gelowiges koers kan verloor en op die breë Pad van die Anti-messias kan beland wat fataal sal wees, omdat die misleidende verskyning van die Anti-messias eerste sal wees, vòòr Melek-Tzadek JaHUsha se Wederkoms en die namaaksel vir die egte aangesien sal word, soos wat die Woord waarsku in 2 Thess. 2:11 – 12. Ina se artikel is 'n poging om Slapendes te laat ontwaak, deur net 'n paar van die gewilde en belangrikste misleidende leringe uit te lig, wat deur die Koninklike Torah van die Messias, [ons Melgisèdek-skrifte (N.T.)], getroef word. Hierdie artikel kan afgelaai word by: [ToeSiloGekomHet](#)

-0-0-0-0-0-0-0-0-

Ontvang YHVH se Woord met welwillendheid, maar ondersoek self die Skrifte of hierdie dinge die waarheid is (Hand. 17:11).

Shabbat Shalom.

Johan.

Epos: kontak@nuwelielied.info

Webwerf: <http://www.nuwelielied.info>

Kopieë mag gemaak en gratis versprei word, maar mag nie verkoop word nie. Geen veranderinge mag aan die oorspronklike teks aangebring word en dit dan onder die naam van Nuwe Lied Bediening versprei nie.